

sier Alvise Contarini qu. sier Andrea *da san Stin*, per il che la Signoria nostra non vien satisfatta, pertanto sia commesso che, pagando li heriedi fra zorni 4 quanto dieno dar, possino pagar senza pena et con il don, *ut in parte*. Fu presa. 174, 8, 7.

Fu posto, per li Savi del Conseio, exceto sier Alvise Gradenigo, et Savi a Terra ferma, exceto il Pexaro, una parte, zerca far governo a l'armada per la egritudine del capitano zeneral; et sier Hironimo Trun savio ai Ordeni, vuol sia balotadi li proveditori de l'armata et uno resti al governo; sier Alvise Gradenigo savio del Conseio, sier Hironimo da Pexaro savio a Terra ferma, et sier Marco Bembo e sier Vincenzo Barozi, savii ai Ordeni, voleno sia eletto doman il governor per Gran Conseio, come noterò poi, et niun parloe. Andò le parte: 4 non sincere, 6 di no, do del Savio ai Ordeni, 42 di Savi, 166 del Gradenigo. Et questa fu presa.

Fu poi lecto una suplication di sier Marin Malipiero, fo patron de la fusta che si rupe in Puia, qual dimanda, *ut in suplicatione*, unde fo: . . .

Fu posto, per li Savi del Conseio et Terra ferma: questo Conseio ha inteso il danno ha auto sier Marin Malipiero patron di la fusta naufragata in Puia, pertanto sia comesso ai tre Savi sora i conti debbi ben veder et examinar li soi conti, si de li homeni remessi come di concieri de la fusta, spexe di boca et altre spexe solite farsi bone a patroni naufragati, justa la leze, li debbi farli boni, aziò sia restaurato in qualche parte, excepto del salario.

Et andò in renga sier Vincenzo Barozi savio ai Ordeni, et contradisse è contra le leze, non se pol metter questa parte, tutti dimanderà.

Et li rispose sier Alvise dà Ponte el XL Criminal. Fo cazadi li parenti del Malipiero et di sier Zuan Contarini proveditor de l'armada, di sier Zuan Bembo, sier Batista Gritti, sier Lorenzo Sannudo qu. sier Anzolo, di sier Polo Capello qu. sier Lorenzo, di sier Giacomo da Mosto qu. sier Alvise et di sier Jacomò Mudazo, et andò la parte, ave: 127, 29, 24; et atento vol . . . , fo terminà per la Signoria che la non habbi hauto el numero de la ballote.

Fu poi fato un Savio sora le acque, in luogo de sier Hironimo Marzello, che compie; rimase sier Zuan Malipiero fo proveditor a le biave, qu. sier Hironimo. Il scurtinio è questo:

Scurtinio de un Savio sora le aque.

Sier Francesco Coco fo proveditor sora le pompe, qu. sier Antonio	90.123	
Sier Filippo Vendramin, qu. sier Leonardo	77.140	
† Sier Zuan Malipiero fo proveditor a le biave, qu. sier Hironimo	144. 66	
Sier Piero Loredan fo consolo in Alexandria, qu. sier Alvise	135. 76	
Sier Marco Antonio Bon fo ai X Savi, qu. sier Michiel	93.122	339*
Sier Hironimo Zen fo Cataver, qu. sier Piero	71.145	
Sier Tomà Lippomano fo podestà et capitano a Feltre, qu. sier Bortolomjo	122. 96	
Sier Antonio Venier fo	93.120	
Sier Vincenzo Michiel fo governador de le intrade, qu. sier Nicolò dottor cavalier procurator	62.152	
Sier Antonio Justinian è di Pregadi, qu. sier Francesco el cavalier	104.108	
Sier Lorenzo Salamon fo podestà et capitano a Feltre, qu. sier Piero	85.135	
Sier Andrea Arimondo fo proveditor a Feltre, qu. sier Simon	35.183	
Sier Marco da chà da Pexaro fo podestà et capitano a Bassan, qu. sier Caroxo	85.130	
Sier Zusto Contarini fo proveditor al sal, qu. sier Lorenzo	130. 81	
Sier Piero da Molin fo proveditor sora i officii, qu. sier Giacomo dottor	62.154	

Da Bergamo, di rectori, di Di le grandissime insolentie fanno quelle zente, *maxime* li sguizari et lanzinech, i quali tra loro venero a le mane.

Da Civald de Friul, del proveditor Pizmano, di 8 (1). È venuto uno mercadante de quella terra, qual è stato a li confini de Alemagna per comprar cavalli, et li conduce a Sazil, al mercato di Roverè; et manda la sua relatione. Referisse esser stato a Cili, luoco di là de Lubiana, donde parti già sono 6 giorni et che in camino parlò con uno corier che era mandato da Vienna con letere in diligentia a Goritia, qual li disse esser partito de quella città a li 26 del passato, et che ogniun se ne era fugito con le donne et robe, perchè lo exercito

(1) Ripetizione della lettera stampata a colonna 523.